

# Var sao, Breiziz!



488

*Da feiz hon Tadou koz, ni paotred Breiz-Izel,  
 Ni zalc'ho mat atao :  
 'Vit feiz hon Tadou koz, hag en-dro d'he banniel,  
 Ni holl en em stardo.  
 Feiz karet hon Tadou, morse ni ho nac'ho,  
 Kentoc'h ni a varvo (ter).*

1

Keit ha ma lugerno e bolz uhel an nenvou,  
 Ar stered hag al loar hag an heol benniguet,  
 Ni a gerzo divrall gant hent ar gourc'hemennou  
 Hag a vevo dalc'hmat 'vel gwir gatoliket.

2

Keit ha ma vezo mor da luskellat Breiz-Izel,  
 Da floura hec'h aochou, da bokat d'e reier,  
 Kristenien e chomimp, en despet d'an holl vrezel  
 A ray d'eomp an dud fall, marc'hadourien geier.

3

Keit ha ma redo dour en hor steriou dudies  
 Ha ma kano er c'harz al labousedigou,  
 Ni 'redo kalonek war roudou santel Jezuz.  
 Hag a gano d'ezan hor c'haera kantigou.

4

Keit ha ma savo brug war gribenn hor meneziou  
 Ha ma tougo al lann bokedou alaouret,  
 Morse ne droimp kein da feiz karet hon Tadou :  
 Ni 'zo eus ar ouenn dud o deus pennou kalet !

## 5

An dero bras o stourm ouz an avel kounnaret  
 A dorr kent 'get plega, hep chal gant ar maro,  
 'Vel-se ni 'zalc'ho penn d'ar bed ha d'an drouk-spered  
 Ha ne blegimp biken, kentoc'h ni a dero !

## 6

An ilio rodellet en-dro da c'har ar wezenn,  
 Daoust d'an amzer diroll a chom stag mat ato ;  
 'Vel-se ouzoc'h, Jezuz, en em stardomp da-viken  
 Ha diouz ho karantez netra n'hen distago.

## 7

Ni a vo kristenien, neket hepken dre gomzou,  
 Met dre an oberou skuillet en hor bubez ;  
 Pedenn hag oferenn, vijil ha sakramanchou...  
 Ni 'heulio penn-da-benn gwenojenn ar furnez.

## 8

Kenavo evit mat d'an holl c'hoariou noazus,  
 D'an dansou miliget, a zaon mil ha mil den !  
 Na glaskomp ket plijout da Satan ha da Jezuz.  
 Ne c'hellomp servija nemet eur mestr hepken.

## 9

Ni 'zo Bretoned yac'h, dispont e giz hon Tadou ;  
 Birvi a ra ennomp kalon ar gwir soudard.  
 Eur Breizad hag a dro da heul ar fals-kredennou,  
 N'eo ket eur gwir Vreizad n'eo nemet eun trubard !

## 10

Mez eta d'ar c'hrener, d'an trubard ha d'an nac'her !  
 Ne deus war an douar netra ken divalo.  
 Ni a chomo bodet dindan banniel Hor Salver,  
 Atao a-du gantan, er vuhez, er maro !

Mat da veza moulet

*Kemper, ar 1 a viz Gwengolo 1929,*

P. MESSENGER, vikel-vras.